

CONSELLERÍA DO MEDIO RURAL

Resolución do 5 de agosto de 2009, da Dirección Xeral de Conservación da Natureza, pola que se fixan as normas dos sorteos e da venda de permisos de pesca en coutos para a tempada 2010.

Segundo establece o artigo 34 do Regulamento de ordenación da pesca fluvial e dos ecosistemas acuáticos continentais (Decreto 130/1997, do 14 de maio), os sorteos de permisos de pesca en coutos realizaranse nos servizos provinciais de Conservación da Natureza, segundo a normativa que fixe a Dirección Xeral de Conservación da Natureza para cada tempada.

De conformidade co anterior, as normas dos sorteos de permisos de pesca en coutos para a tempada 2010 serán as seguintes:

-Número de sorteos.

En cada servizo provincial de Conservación da Natureza realizaranse dous sorteos, un para permisos de salmón e outro para permisos de troita, incluíndose neste último, de ser o caso, os permisos de reo, de pesca intensiva e de pesca sen morte. Deste xeito, o número total de sorteos será de oito.

-Tipos de solicitudes.

Para cada sorteo poderán presentarse solicitudes individuais ou en grupo, cun máximo de tres solicitantes por grupo.

Os impresos de solicitude estarán dispoñibles nos servizos provinciais de Conservación da Natureza, nesta dirección xeral ou na páxina web <http://medioambiente.xunta.es/formularios.jsp>.

Quen participe só poderá figurar nunha solicitude para cada un dos sorteos.

-Presentación das solicitudes.

Poderán presentarse solicitudes escritas no modelo antes sinalado ou por medio dunha aplicación informática dispoñible na páxina web <https://www.xunta.es:444/pescafluvial/>.

Na admisión de solicitudes aplicaranse as seguintes normas:

1. Solicitudes por escrito.

Presentaranse nos rexistros dos departamentos territoriais da Consellería do Medio Rural ou mediante calquera dos procedementos descritos no artigo 38 da Lei 30/1992, do 26 de novembro.

Tanto nas solicitudes individuais coma nas solicitudes en grupo deberá figurar a sinatura de cada solicitante.

Ás solicitudes presentadas dentro do prazo establecido pero que sexan recibidas polo servizo provincial logo do sorteo asignaráselles un número de elección ao final da listaxe.

2. Solicitudes telemáticas.

Para o acceso ao formulario será necesario introducir o número de DNI e mais o da licenza de pesca fluvial, a vixente ou calquera outra de anos anteriores. Para solicitudes en grupo será preciso introducir tanto os números de DNI coma os das licenzas da totalidade de participantes.

O enderezo para notificacións relacionadas co sorteo será por defecto o que figura na licenza. Non obstante, e para efectos das sucesivas notificacións, o petionario poderá modificar este enderezo na propia páxina web durante o rexistro da súa solicitude.

3. Duplicidade de solicitudes nun mesmo sorteo.

O acceso ás solicitudes telemáticas quedará bloqueado logo de que estea rexistrada unha primeira solicitude.

No caso de que un mesmo DNI conste nunha solicitude telemática e mais nunha solicitude escrita, anularase a solicitude telemática.

No caso de que un mesmo DNI conste en varias solicitudes escritas, anularanse as máis antigas, prevalecendo sempre a última data de rexistro de entrada.

No caso de solicitudes en grupo, as anulacións afectarán unicamente aqueles DNI repetidos.

Non se considerarán duplicidades cando as solicitudes presentadas teñan por obxecto diferentes sorteos.

4. Prazo de presentación das solicitudes.

O prazo de presentación de solicitudes iniciarase o día seguinte ao da publicación desta resolución e rematará o 30 de setembro de 2009 ás 14.00 horas.

5. Consulta da admisión de solicitudes.

As solicitudes admitidas, logo da súa introducción na aplicación informática, poderán ser consultadas na páxina web <https://www.xunta.es:444/pescafluvial/>. Para acceder á consulta unicamente será preciso introducir o número de DNI.

Do 15 ao 27 de outubro haberá un período de reclamacións para todos aqueles que non se atopen nas listas ou que pensen que non están ben introducidos. As ditas reclamacións poderanse facer directamente a través da páxina web da consellería no correspondente punto de reclamacións no propio portal <https://www.xunta.es:444/pescafluvial/>, ou ben por escrito. No caso de presentación telemática, será preciso identificarse introducindo o número de DNI.

-Realización dos sorteos.

En cada sorteo, as solicitudes numeraranse correlativamente, comezando polo 1, segundo a orde de entrada na aplicación informática.

Os sorteos serán públicos. Cada sorteo realizarase con tres ou catro bombos, segundo sexa preciso polo número de solicitudes presentadas, correspondendo cada un deles ás unidades, decenas, centenas e

milleiros. En cada bombo introducíranse dez números, do 0 ao 9, excepto no que corresponda aos milleiros, en que unicamente se introducirán os números necesarios para cubrir os miles de solicitudes presentadas. Sacarase un número completo formado por tres ou catro bólas segundo proceda. No caso de que o número constituído polas bólas exceda o que corresponda á última solicitude presentada, procederase a sortear de novo, devolvendo as bólas aos correspondentes bombos e repetindo a operación.

A solicitude que se corresponda co número extraído será a primeira en elixir, e continuarase a elección por orde correlativa ata rematar a listaxe e seguir a partir do 1.

Os sorteos terán lugar nos servizos provinciais de Conservación da Natureza o día 13 de novembro de 2009 ás 12.00 horas da mañá.

-Resultados dos sorteos.

Os resultados dos sorteos poderán consultarse na páxina web <https://www.xunta.es:444/pescafluvial/>. Para acceder á consulta será preciso introducir o número de DNI.

Así mesmo, a cada solicitante notificaráselle o día e mais o rango horario en que poderá escoller os permisos. No caso de solicitudes en grupo só recibirá a notificación quen figure en primeiro lugar.

-Elección de permisos.

Para a elección de permisos, os servizos provinciais establecerán grupos de coutos. A listaxe dos grupos de coutos será exposta no taboleiro de anuncios de cada servizo provincial e na páxina web <https://www.xunta.es:444/pescafluvial/>. Xunto coas notificacións dos resultados dos sorteos remitirase unha copia desta listaxe.

Á hora da escolla, cada solicitante só poderá seleccionar dous permisos en cada grupo de coutos, dos cales só un poderá corresponderse cun sábado, domingo ou festivo. Nos sorteos de salmón de Lugo e Pontevedra só se poderá escoller un permiso por cada grupo de coutos.

Na páxina web <https://www.xunta.es:444/pescafluvial/> poderá consultarse en tempo real o número de permisos dispoñibles en cada couto e para cada xornada de pesca.

A escolla poderá realizarse por calquera dos seguintes medios:

1. Persoalmente no servizo provincial que corresponda, na data e dentro do rango horario que se sinala na notificación.

2. Mediante chamada telefónica ao número que se indique na notificación, na cal tamén se sinalarán a data e rango horario en que deberá realizarse esta chamada.

3. Directamente na páxina web <https://www.xunta.es:444/pescafluvial/>. Para acceder a este servizo

deberase introducir o número de DNI e unha clave subministrada para tal efecto xunto coa notificación do resultado dos sorteos. O servizo de reserva pola internet estará dispoñible para cada usuario na data e rango horario que se sinalen na notificación. Rematado o rango horario sen terse producido a escolla, o usuario non terá dispoñible o servizo durante os horarios de reservas telefónicas, é dicir, en xornadas laborables entre as 9.00 e as 14.00 horas. Fóra deste horario, calquera usuario que non escollese na súa quenda poderá escoller de entre os permisos dispoñibles en cada momento.

Unha vez confirmada unha reserva por calquera dos medios previstos, non poderá ser modificada polo solicitante.

-Segunda venda de permisos.

Unha vez rematada a escolla, os permisos sobran tes e aqueles non retirados nos prazos fixados serán incluídos nun segundo proceso de escolla. Este procedemento será unicamente a través da páxina web <https://www.xunta.es:444/pescafluvial/>, cos mesmos requisitos de acceso que anteriormente. O servizo de reserva pola internet estará dispoñible ininterrompidamente para todos os participantes no sorteo a partir da data e hora de inicio.

Xunto coa notificación dos resultados do sorteo facilitaranse as datas e a hora de comenzo e remate da segunda venda e a data previa en que se exporán na páxina web indicada o total dos permisos dispoñibles para esta segunda escolla e que deberá ser, cando menos, tres días antes do comenzo da escolla.

As normas, en canto aos grupos de coutos e ao número de permisos por grupo serán as mesmas que na primeira escolla.

-Venda libre.

Os permisos non escollidos e aqueles non retirados nos prazos fixados serán postos á venda nos servizos provinciais de Conservación da Natureza ata 10 días naturais antes do comenzo da tempada en cada couto de pesca. Para a adquisición destes permisos non será preciso ter participado no sorteo. Os permisos dispoñibles para a venda libre estarán colgados na páxina web citada con, cando menos, tres días de antelación á data de posta á venda.

Manteranse as mesmas normas que no sorteo, non obstante, os límites en canto ao número de permisos por grupo serán diarios, de tal xeito que unha determinada persoa só poderá adquirir permisos unha vez ao día. O servizo de reserva pola internet estará dispoñible as 24 horas do día, logo de introducir o número de DNI e mais o da licenza de pesca.

Rematado o prazo anterior, os permisos dispoñibles poranse á venda de conformidade co disposto no artigo 35 do Regulamento de ordenación da pesca fluvial e dos ecosistemas acuáticos continentais (Decreto 130/1997, do 14 de maio).

-Expedición de permisos.

No prazo de 10 días naturais, contados desde a data da escolla, os permisos seleccionados deberán ser pagados nunha entidade bancaria e recollidos no servizo provincial.

Nos casos de reserva a través da páxina web, podeuse efectuar o pagamento telematicamente mediante tarxeta de crédito na mesma páxina web.

En cada servizo provincial facilitaranse os impresos de liquidación de prezos públicos/privados, necesarios para o pagamento do importe dos permisos nas oficinas bancarias autorizadas, así mesmo, estes impresos serán remitidos xunto coas notificacións dos resultados dos sorteos. Os permisos teñen carácter persoal e intransferible; cada titular de permisos debe realizar o pagamento individualmente, mesmo nos casos de solicitudes en grupo.

Nos casos en que non se retiren os permisos persoalmente, o pagamento deberá acreditarse, no mesmo prazo de 10 días naturais establecido no parágrafo primeiro deste punto, remitíndolle por fax ao servizo provincial a copia para a Administración do impreso de liquidación debidamente formalizado. Tamén será posible facelo mediante correo electrónico escaneando a copia citada do impreso de liquidación e remitíndoa ao correo electrónico do servizo correspondente que se indicará na carta de notificación do resultado do sorteo. Nestes casos, os permisos serán remitidos por correo ao enderezo que conste na solicitude.

-Outras normas.

A normativa de funcionamento dos coutos será a que estableza a orde anual que regula os períodos hábiles de pesca e normas relacionadas con ela nas augas continentais da Comunidade Autónoma de Galicia durante a tempada de 2010. Os permisos serán outorgados con esta condición e sen que os posibles cambios na normativa poidan dar lugar a cambios de permisos, agás no caso concreto de que se prohiba a práctica da pesca na data ou no couto obtido.

Segundo o establecido no artigo 7.3º do Regulamento de ordenación da pesca fluvial e dos ecosistemas acuáticos continentais (Decreto 130/1997), os permisos de pesca teñen carácter persoal e intransferible. Logo da expedición dun permiso, non se poderá anular nin transferir a outra persoa nin obter o reintegro do seu importe, agás no caso previsto no parágrafo anterior. En todo caso, cando proceda o reintegro do importe, será preciso presentar unha solicitude escrita á cal se xunte unha copia do impreso de pagamento en que figuren os datos do titular do permiso.

Santiago de Compostela, 5 de agosto de 2009.

Ricardo García-Borregón Millán
Director xeral de Conservación da Natureza

Resolución do 24 de agosto de 2009, da Dirección Xeral de Producción Agropecuaria, pola que se procede á publicación dos requirimentos de emenda de documentación das solicitudes presentadas ao abeiro da Orde do 27 de febreiro de 2009 pola que se establecen as bases reguladoras das axudas para a promoción da recría de gando vacún en Galicia e se convocan axudas para o ano 2009.

O órgano instrutor do procedemento administrativo de subvencións establecido na citada orde reguladora revisou as solicitudes presentadas ao abeiro da dita orde, identificou tanto as solicitudes que se presentaron sen erros e dispoñen de toda a documentación preceptiva, como aquelas solicitudes en que non se reúne algún dos requisitos exixidos.

O artigo 12.2º da orde reguladora dispón: «O requirimento de emenda de erros da solicitude, por tratarse dun acto integrante dun procedemento de concorrencia competitiva, e de conformidade co establecido nos artigos 59.6º b), 60 e 61 da indicada Lei 30/1992, farase mediante publicación no *Diario Oficial de Galicia*, e producirá os mesmos efectos que a notificación individualizada. Esta publicación tamén se realizará no taboleiro de anuncios e na páxina web da Consellería do Medio Rural ao cal se remitirá desde o texto publicado no *Diario Oficial de Galicia*».

Neste mesmo artigo 12.6º tamén se dispón: «Abaremação das solicitudes, segundo os criterios do artigo 11º, da citada orde de convocatoria, efectuarase por un órgano colexiado constituído para o efecto, formado por: presidente: o subdirector/ a xeral de Gandaría; vogal: o/a xefe/a do Servizo de Planificación Gandeira, e secretario: o/a xefe/a do Servizo de Producións Gandeiras, que emitirá o informe correspondente».

Na súa virtude,

RESOLVO:

1. Ordenar a publicación no *Diario Oficial de Galicia* da relación de solicitudes que reúnen todos os requisitos para a súa valoración, segundo o establecido na orde reguladora citada. Esta relación achégase como «Anexo I - Solicitudes correctas» desta resolución.

2. Ordenar a publicación no *Diario Oficial de Galicia* da relación de solicitudes que non reúnen todos os requisitos para a súa valoración, ben en canto a documentación preceptiva (artigo 9.3º), ou para a acreditación de criterios de baremación en concorrencia competitiva (artigo 11º), por estaren suxeitas a emendas ou achegas de documentación, segundo o establecido na orde reguladora citada. Esta relación achégase como «Anexo II - Solicitudes suxeitas a emenda de documentación» desta resolución.